



Komunikadu Imprensa
Semináriu Rejionál Dili
Dili 18 Juñu 2018

**Semináriu Rejionál kona-ba Kna'ar Parlamentu Nasionál no Autór Judisiáriu
iha Sistema Justisa Formál Timor-Leste**

Iha 08 Juñu 2018, JSMP realiza semináriu rejionál iha Dili kona-ba “Kna'ar Parlamentu Nasionál (PN) no Kna'ar Autór Judisiáriu iha Sistema Justisa Formál Timor-Leste”. Semináriu ne'e hahú ho apresentasaun JSMP kona-ba deskobremetu sira JSMP iha Parlamentu Nasionál no funksionamentu setór justisa durante tinan 2017. JSMP apresia prezensa representante Parlamentu Nasionál no autór judisiáriu atu rona JSMP nia rezultadu observaun no deskobremetu hirak-ne'e.

“Sesaun sira hanesan ne'e importante tanba bele fasilita interasaun no kontaktu entre representante comunidade sira ho membru deputadu sira no autór judisiáriu sira hodi bele apresenta sira nia preukupasaun no espetativa sira diretamente ba autóridade kompetente sira ne'ebé sei halo polítika estadu nian no autór judisiáriu sira ne'ebé sei administra justisa”, dehan Diretór Ezekutivu JSMP, Luis de Oliveira Sampaio.

Forum ne'e nu'udar espasu ne'ebé apropriadu no pertenente ba xefe aldeia, xefe suku, estrutura suku sira no grupu minoritáriu sira iha sosiedade tanba sira bele kanaliza sira nia difikulidades, problema sosiál no dezafiu sira no rona rasik hosi autóridade sira hodi konsidera no formula iha polítiku estadu nian, nia hatutan.

Kestaun ne'ebé partisipante sira foti mak kona-ba prosedimentu ba prosesu halo adopsaun ba labarik, okupante rai ne'ebé la kumpri desizaun tribunál hodi lakohi sai hosi rai ne'ebé nia okupa ba maske iha ona desizaun tribunál, desizaun tribunál nian ne'ebé la iha partisipasaun husi interesadu sira, nune'e mós prosesu arkivamentu kazu iha ministériu públiku ne'ebé halo husi ofisiál justisa sei informa interesadu sira no diferensia entre kna'ar defensoria públiku no advogadu privadu iha aspeitu prestasaun assistensia legál ba comunidade.

Iha parte seluk, asuntu ne'ebé partisipantes sira dirijé ba Sr. Deputadu Arão, nu'udar Kordenador Jurisdisaun AMP mak hanesan facilidade ba suku ne'ebé menus, insentivu ba delegadu no delegada nomós lia nain sira ne'ebé la justu tuir kodigu traballador, servisu fiskalizasaun PN ba projeitu sira, asesu grupu LGBT ba edukasaun no saúde ne'ebé dala barak hetan diskriminasaun nomós husu atu sé bele kria lei espesifiku ida atu trata asuntu sira kona-ba direitu grupu LGBT sira iha futuru.

Relasiona ho pergunta hirak ne'e, Deputadu Parlamentu Nasionál, Sr. Arao Noe esplika katak iha hanoin atu aumenta osan insentivu ne'ebé adekudu ba delegadu suku sira, maibé tanba rejultadu eléisaun 2017 sai oin seluk, nune'e nia espera iha governasaun AMP sei resolve kestaun ne'e. Deputadu Arão Noe mós afirma katak sira sei kontinua halo fiskalizasaun tanba ne'e kna'ar

deputadu sira nian no ba projeitu estrada sira tuir planu AMP sei kontinua fokus fila-fali ba postu sira iha ukun AMP nian tinan 5.

Nune'e mós liga ba kazu grupu LGBT sira nian deputadu ne'e lamenta ho atitudi atendimentu diskriminativu hirak ne'e no husu atu keixa hodi hetan sansaun sé iha funsionáriu husi instituisaun estadu nian ne'ebé halo atendimentu diskriminativu ba grupu LGBT sira. Nia mós hanoin katak se iha possibilidade atu iha hanoin ba futuru bele ona hanoin atu kria lei espesifiku ba grupu LGBT sira, maibé nia subliña katak konstituisaun garante katak sidadaun hotu-hotu iha direitu hanesan atu asesu ba kualker oportunidade ne'ebé iha institusaun estadu sira iha nasaun ne'e.

Juis Administrador Tribunál Distritál Dili esplika katak iha kazu semi públiku, vítima mak iha liu lejitimidade atu inísia prosesu ruma ka atu halo keixa ba autóridade polisiál ka minsitériu públiku. Relasiona ho desizaun juis nian ba kazu rai ne'ebé iha ona desizaun definitivu, parte sira obrigatóriamente tenki simu. Bainhira tribunál iha ona desizaun definitivu no se parte sira la simu, sei uja forsa lejitimu husi polísia atu ezejuta. Nune'e mós kona-ba direitu entre oan adopsaun no oan rasik juis afirma katak sira iha direitu hanesan bainhira iha ona legalidade hosi tribunál.

Kona-ba kestaun arkivamenu kazu iha ministériu públiku, sein informasaun klaru ba parte sira, Xéfi Prokurador Distritál Dili esklaresa katak prosesu arkivamentu ne'e la signifika katak kazu ne'e taka ona. Arkivamentu ne'e iha oin rua, ida arkiva totál no ida seluk arkiva parsial. Arkiva totál signifika katak hetan indísiu sufisiente kona-bá krime ida; kuandu la hatene se maka halo krime; no kuandu lei la fo-fatin ba prosedimentu kriminál. Enkuantu arkiva parsial katak sei iha possibilidade atu loke fali prosesu se iha prova foun ruma hodi reforsa sira ninia pozisaun. Tanba ne'e nia husu atu husi parte sira bele husu esplikasaun klaru kona-ba kazu refere iha ofisiál justisa iha ministériu públiku. Aliende ne'e, kona-ba kazu adopsaun nia dehan katak antes atu halo adopsaun tenki liu hosi dalan tribunál atu legaliza atu tetu hodi haree ba kondisaun hotu atu bele difini katak merese ka lae ema ne'e bele halo adopsaun hodi bele evita problema depois adopsaun.

Relasiona diferensia kna'ar defensor públiku ho advogadu privadu nian Koordinator Defensória Públiku Jerál haktuir katak kna'ar prinsipál defensor públiku mak atu fó assisténsia jurídiku ba ema kbi'it laek sira no sei la simu osan husi se deit durante halao nia kna'ar advokasia tanba sira nia salariu kobre husi estadu. La hanesan ho advogadu privadu ne'ebé kaer kna'ar hanesan atu fó asitesia legál no juridiku tuir lei, maibé sira hetan osan hosi sira nia kliente tanba sira halao sira nia servisu uja sira nia osan rasik.

Partisipante sira mai hosi representante xéfe suku, xéfi aldeia no membru konsellu suku balun ne'ebé antes ne'e JSMP organiza ona atividade workshop iha sira nia suku ida-idak inklui mós grupu LGBT (*Lesbian, Gay, Bisexual* no *Transgender*) iha Dili. Representante hirak-ne'e ema nain 15 hosi Suku Lihu, Postu Administrativu Railaco, Munisípiu Ermera, Suku Beloi Postu Administrativu Atauro, Munisípiu Dili, Suku Hatukesi Postu Administrativu, Liquiça, Munsípiu Liquiça, inklui representante hosi grupu LGBT nain 5 hosi Dili. Totál partisipante sira hamutuk ema nain 20.

Oradór sira iha semináriu ne'e mai-hosi representante Parlamentu Nasionál no autór tribunál sira hosi Jurisdisaun Tribunál Distritál Dili ne'ebé representante hosi deputadu Arão Noe de Jesus Amarál, Juis Administradór Tribunál Dili, Dr. Jose Maria de Araújo, ne'ebé ko'alia kona-ba kna'ar tribunál iha sistema justisa formál Timor-Leste nian no ministériu públiku representa hosi Dr. Alfonso Lopez ne'ebé ko'alia kona-ba kna'ar Ministériu Públiku no dezafiu sira. Enkuantu defensor públiku representa hosi Dr. Sergio Hornai, ko'alia kona-ba Kna'ar Defensória Pública iha fornese asisténsia legál ba ema kbiit laek sira tuir Konstituisaun no lei sira.

Programa ne'e realiza tanba hetan apoiu finansieru hosi Governu Australia liuhusi Embaixada Australia iha Timor-Leste.

Atu hatene informasaun liutan bele kontaktu:

Luis de Oliveira Sampaio

Diretór Ezekutivu JSMP

E-mail: luis@jsmp.tl

www.jsmp.tl